

李文忠公奏稿

李文忠公奏稿

卷之二十二目錄

開通趙王河摺

同治十二年六月初十日

改派長蘆絲布請復舊制摺

同治十二年六月初十日

駱國忠請卹摺

同治十二年六月初十日

烏城借撥軍火解清片

同治十二年六月二十日

籌議黃運兩河摺

同治十二年閏六月初三日

請行海運片

同治十二年閏六月初三日

慶祺請附祀僧王祠片

同治十二年閏六月二十日

長蘆復價仍請減收摺

同治十二年閏六月二十日

長蘆白絲請派產絲省分摺

同治十二年七月二十一日

上屆賑需續收捐數摺

同治十二年七月二十一日

酌定各省協賑捐

同治十二年八月初三日

籌撥官兵赴烏協防捐

同治十二年八月初三日

張家口糧臺請撥餉捐

同治十二年九月初七日

長蘆南河解款留抵永定捐

同治十二年九月十三日

蘆綱原停引日照案展限捐

同治十二年十月初一日

截留洋稅捐

同治十二年十月十二日

祕魯使臣議約捐

同治十二年十月十八日

統籌工賑事宜捐

同治十二年十月二十七日

回省日期片

同治十二年十月二十七日

蘆商公櫃撥借成本捐

同治十二年十月二十七日

豫籌橋道事宜捐

同治十二年十一月初八日

順屬兵差由司局彙核捐

同治十二年十一月十九日

奏留吳贊誠片

同治十二年十一月十九日

鄭魁士請議卹予諡摺

同治十二年十一月十九日

議停長蘆欠款摺

同治十二年十二月初九日

管河縣丞移駐片

同治十二年十二月初九日

籌撥河夫工食片

同治十二年十二月初九日

奉天米豆暫改折色摺

同治十二年十二月十九日

李文忠公奏稿卷二十二

全集一之二十二

桐城吳汝綸編錄

開通趙王河摺

同治十二年六月初十日

奏爲開挖趙王河瀉西淀之水以工代賑現已完竣恭摺仰祈  
聖鑒事竊查保定府屬之西淀跨安州新安高陽任邱雄縣數邑  
之境西北萍河雹河及一畝泉方順河漕河徐河所匯之依城河  
西南滌河沙河唐河所匯之潞龍河皆注之其各處泉水支河依  
附而來者尙不知凡幾源遠流長派繁勢盛實爲巨浸向由趙北  
口連橋下會大清河而達東淀眾派之水專洩一河勢難暢達加  
以連橋日久淤阻河身本形窄淺全淀之水幾無所容而近年雄  
縣清河趙村決口白溝河水自北漫入淀內潴沱河水復泛連滋  
河由潞龍西南入淀該淀既難下洩兩處渾流又相並注不特汎

漲爲害滋深平時雨水稍多卽橫決四溢爰新任雄一帶田園廢舍多在積潦之中上游河道皆無歸宿臣熟籌補救因於上年秋後奏請預撥庫款以工代賑一而飭據清河河道葉伯英周歷詳勘博采眾議定爲堵趙村決口築淤河潞龍河南隄以禦外水挑濬盧僧中亭兩河分減大清河水勢以免倒灌西淀至於西淀下游尤必開分流之河使其去路稍暢查任邱之苟各莊舊有趙王河經雄縣保定縣境至鴈嘴壩出口歸大清河應將趙北口街南之連橋六孔全行疏通以靠南第二孔爲正河引淀水出諸孔匯正河全注大港淀就大港淀引河並靠千里長隄濠溝舊跡開挖寬深順至苟各莊入趙王河其趙王河身已極淤淺一律挑清仍於苟各莊以上之毛隄及下口之鴈嘴壩各建閘座以資宣蓄今春臣由省來津便道相度卽令該道葉伯英視督卽委各員次第興

辦彼時水勢泛漲上下一片汪洋先將南岸長隄殘缺酌發銀兩  
責成任雄兩縣逐一堵合其北岸無隄處所起築長埧淀口河口  
用壩攔截皆於水中施工所需椿料既多又無處取土撈方填築  
辦理甚形艱苦截住外水後復於河身節節築壩多置水車將積  
水淘盡招集遠近災黎益以直字營勇丁於三月底逐段開挖其  
連橋橋孔及橋之東西水勢湧濤設法截堵廣雇船夫夾泥撈挖  
悉成深槽尤費工力仍視工程難易酌給方價犒賞計連橋西二  
里許起至鴈嘴壩出口止其長六十里內苟各莊以上至東里長  
一千五百餘丈本無濠溝係屬新開河道其餘原濠原河僅深三  
四尺寬三四丈一律開至面寬十丈底寬五丈五尺深九尺兩岸  
隄工因地制宜築高六七尺至丈餘不等力加夯礮添做椿工並  
將連橋及下游史各莊橋座分別加高修固俾通舟楫鴈嘴壩建

聞以時啟閉均於五月底完竣委據候補道祝壇驗收工段丈尺相符卽經開壩放水大溜東趨勢極暢順上游安新等處及淀邊田地日見乾涸先於雄縣下村開放白草窪積水涸出窪地數百頃又放任邱鄆州大窪積水附近四十八村田廬復見陸地此皆多年被淹者今已播種秋稼窪心賸水無多亦栽稻秧仍將近窪隄身酌留涵洞洩水布置均合機宜民情極爲懽感臣維直隸地勢西北高而東南下各河皆以淀池爲宣蓄西淀係數百里河道民生一大關鍵淤阻已久水患頻仍今議開趙王河以通去路工程甫竣積淤窪區已多耕作從此時加修守民生可免昏墊農田冀獲有收實於地方全局有裨清河道葉伯英盡心民事督辦隄河各工將次全竣而趙王河最爲緊要亦極費手竟能剋期告成在事印委各官皆力任艱瘁不無微勞足錄可否請



旨准其擇尤策獎勵除飭將善後事宜妥籌舉辦外理合恭摺  
具陳伏乞

皇上聖鑒訓示謹

奏

改派長蘆絲布請復舊制摺

同治十二年六月十五日

奏爲改派長蘆絲布等項請仍歸各該省采辦以復舊制而紓商困恭摺仰祈

聖鑒事竊照長蘆物力微薄商情拮据向無年例派辦絲布之案前因南省被兵辦解不能及時自同治四五年以後疊准戶部內務府分派長蘆絲斤布疋絹箋等項原屬暫時通融厯據運司設法采辦所需價值議以催交補欠積欠兩款抵銷查補欠積欠等款係嘉道以前商人欠項茲令現商代交前商之欠該商等苦累日甚力實未逮同治十年正月間臣於奏請酌減課款案內擬將補欠積欠停徵准戶部議奏以傳辦雖非長蘆年例遇有急需不得不就近采買如有款可以撥抵卽專案覆奏准將補欠積欠停徵五年以恤商艱而保課額等因是部臣亦知采辦非長蘆所應

有積欠非現商所能補近復連遭災歉灘地被淹成本加重運道阻滯腳力增倍銀價過昂各商艱窘尤甚本身課款尙須展緩焉有餘力代完前商舊欠庫儲支絀又無他款可以撥抵從前遵辦絲絹須赴外省轉向商販重價勻湊往往遲誤不能應急木棉歉收布價亦昂皆非南省貨色可比以不貲之費而辦不甚適用之物殊覺不值是以上年十二月內務府派辦白絲經臣奏請另派產絲省分辦解奉

硃批著照所請欽此查絲斤布疋等項向例由江浙撫臣及三織造承辦目下南省肅清已久絲棉出產已旺財力又較長蘆富厚以每屆所派長蘆之件分諸各省尤屬眾擎易舉蘆綱情形岌岌應徵引課應攤帑利等項已屬不少實未便再以前商舊欠他省絲布責令現商俱辦轉致藉口虧課據運司成孚具詳前來相應

仰懇

天恩准將嗣後長蘆奉派絲斤布疋絹箋等項仍照內務府派辦  
白絲之案一體改歸各該省辦解以復舊章並將補欠積欠兩款  
照部議暫行停徵俟商力稍紓再飭捐解彌補理合恭摺具陳伏  
乞  
皇上聖鑒訓示施行謹  
奏

駱國忠請卹摺

同治十二年六月初十日

奏爲提督戰功卓著在營病故奏請

優卹並懇

加恩予諡恭摺仰祈

聖鑒事竊據總統銘字武毅等軍布政使銜遇缺題奏按察使劉  
盛藻詳據武毅右軍前左右後營官提督聶士成蘇得勝鄧正峯  
總兵董正明等會稟稱該員等分帶武毅右軍四營均歸記名提  
督駱國忠統帶同治十二年五月初九日駱國忠在陝西乾州軍  
營積勞病故臚列戰績稟懇轉詳

奏卹前來臣查記名提督勁勇巴圖魯駱國忠現年三十九歲安  
徽鳳陽縣人於同治元年十二月內在江蘇常熟昭文縣城設計  
誘殺偽憑天安錢嘉仁等舉城反正並乘勢攻克福山要隘將積

年出江肆劫廣賊誅戮殆盡嗣經踞守蘇城之僞忠逆糾集悍黨六七萬竄陷福山圍攻常昭該提督激勵城內軍民喻以大義登陣固守晝夜堵禦兩月有餘殲斃爬城及穿挖地道悍賊多名所部弁勇死傷亦眾困守孤城毫無退阻迨官軍再克福山該提督派隊接應攻毀附城賊壘二十餘座生擒逆首李天義朱衣點等奪獲賊船數十隻城圍立解經臣奏奉

諭旨駱國忠於四面賊區之中殺賊獻城復當蘇城大股晝夜環攻七十餘日竟能力保孤城堅忍苦戰以待援師實屬出死入生效忠不二非尋常降眾可比著以副將用並賞加總兵銜賞戴花翎等因欽此嗣復隨臣攻克常州肅清蘇境並克復浙江嘉興等城迨臣奉

旨勦辦擒逆檄調隨軍該提督無役不從無戰不捷身冒矢石屢

瀕危險存保今職並於勦平張總忠念股案內蒙

恩賞穿黃馬褂上年九月劉盛藻遵

旨赴陝接統銘軍經臣查明該提督駱國忠義能服眾智足應變  
總理營務駕馭得宜奏明派令隨同劉盛藻前往整頓並令管帶  
駐紮保定之銘字親軍洋鎗炸礮兩營由豫赴陝到防以後派令  
總理營務兼統帶武毅右軍五營訓練操防不遺餘力深資臂助  
不意積勞成疾遽爾溢逝營中將士皆爲失聲該提督昔因鄉里  
被賊全家淪陷僅遺一子年甫七歲又素明大義奉公廉潔身歿  
之日家無餘財情形尤堪憫惻合無仰懇  
天恩准將記名提督勁勇巴圖魯駱國忠  
敕部照提督立功後在營病故例議卹並可否

加恩予諡以慰忠魂除飭取履歷事實分咨查照外所有提督立

功最著在營病故籲請

優卹緣由理合恭摺具陳伏乞

皇上聖鑒訓示謹

奏



烏城借撥軍火解清片

同治十二年六月二十日

再前准前烏里雅蘇臺將軍金順咨請借撥洋藥銅帽以濟急需當經飭據天津軍械所機器局先行商撥細洋鎗藥六千磅銅帽六十萬顆交來員副將劉永慶領解附片

奏明在案正起解開欽奉

寄諭金順軍火不敷飭江蘇巡撫趕緊購辦細洋藥二萬磅大銅帽四百萬粒三楞礮藥五千磅派員航海運至天津未免久需時日著李鴻章按照金順所請先由天津現存之洋藥銅帽等項照數撥給由金順派員領解著恩錫趕緊如數購辦解赴天津歸還不得有誤等因欽此臣查前項軍火係西征要需惟爲數過多沿途照料難周自須分批陸續起解當卽札飭機器局軍械所加撥洋鎗藥四千磅合前撥之數共一萬磅大銅帽一百四十萬粒合

前撥其二百萬粒又礮藥五千磅統交副將劉永慶管解回營其  
後批軍火現經該將軍仍派劉永慶來津領取江蘇撫臣已將撥  
還洋藥委員運津並咨明銅帽一項購自外洋俟采運到滬再行  
委解歸款復經札飭軍械所卽於蘇省解還火藥項下找發細洋  
藥一萬磅並墊撥大銅帽二百萬粒點交副將劉永慶於六月初  
十日由津起解回營除咨行沿途經過州縣預備車輛護送前進  
外所有遵

旨借撥軍火全數解清緣由理合附片覆陳伏乞

聖鑒謹

奏

籌議黃運兩河摺

同治十二年閏六月初三日

奏爲遵

旨從長計議黃運兩河情形據實詳細覆陳恭摺仰祈

聖鑒事竊臣承准軍機大臣字寄同治十二年二月初一日奉

上諭前因喬松年奏籌辦黃運兩河情形文彬丁寶楨奏請仍挽

復淮徐故道並御史游百川奏河運並治宜詳籌妥辦等情當經

降旨交軍機大臣會同六部九卿妥議具奏茲據遵議會奏請派

大員前往山東查勘各等語黃河自銅瓦廰決口改道北行後泛

濫山東境內久爲漕運民生之害現在淮徐故道旣難規復豈可

聽其自然不爲修治喬松年前奏堵合霍橋決口築隄束水使由

張秋八里廟一口下注入海旁流分注藉以濟運所擬辦法究竟

是否可行有無窒礙必須籌畫萬全方可興辦此事關係重大固

不可日久因循亦未便輕率從事李鴻章曾在山東勦辦捻匪於黃運兩河閱歷既久自必熟悉著該督將喬松年等所奏悉心體察從長計議應如何妥籌辦法期於漕運民生兩有裨益及辦理有無把握之處據實詳細具奏等因欽此仰見

聖慮周詳實事求是欽悚莫名臣自少壯南北奔走嗣督師追賊往來河上疊就黃運兩河築圍圈賊雖於河務非所素習而閱歷變遷討論掌故采擇眾議略有見聞奉

命後復遴派幹練耐勞之員分投前往訪察測量茲謹悉心妥議爲我

皇上詳細陳之伏查治河之策原不外恭親王等所奏審地勢識水性酌工程權利害四語而四語之中尤以水勢順逆爲要現在銅瓦鑲決口寬約十里跌塘過深水涸時深逾三丈舊河身高決

以下水面二丈內外及三丈以外不等如其挽河復故必挑深  
引河三丈餘方能吸溜東趨查乾隆年間蘭陽青龍岡之役費帑  
至二千餘萬大學士公阿桂奏言引河挑深一丈六尺人力無可  
再施今豈能挑深至三丈餘乎十里口門進占合龍亦屬創見  
國初以來黃河決口寬不過三四百丈尙且屢堵屢潰常閱數年  
而不成今豈竟能合龍而保固乎且由蘭儀下抵淮徐之舊河身  
高於平地約三四丈風沙成堆老淤堅結年來避水之民移住其  
中村落漸多禾苗無際若挽地中三丈之水跨行於地上三丈之  
河其停淤待潰危險莫保情狀有目者無不知之而歲久乾隄卽  
加修治必有受病於不易見之處萬一上游放溜下游旋決收拾  
更難議者或以河北行則爲運道計終不能不強之南行以  
合清口耳查嘉慶以後清口淤墊夏令黃高於清已不能啟壩送

運道光以後禦黃壩竟至終歲不啟遂改用灌塘之法自黃浦洩  
黃入湖湖身頓高運河水少灌塘又不便遂疊次奏行海運彼時  
河務運務實有岌岌不可終日之勢蓋自明末迄

國初借清刷黃頗蒙其利厥後河淮不能合流天時地利人事三  
者皆窮今即能復故道亦不能驟復河運非河一南行即可僥倖  
無事也恭讀道光八年十二月初五日

上諭江境禦黃壩上下一帶黃河積年淤墊以昔證今已成不可  
救藥之勢等因欽此

聖慮周詳早已洞悉無遺此淮徐故道勢難挽復且於漕運無甚  
裨益之實在情形也至河上喬松年所擬就東境東黃濟運一節  
臣查當年清口淤墊即是借黃濟運之病乾隆二十三年八月  
諭河臣白鍾山曰引黃入運黃水多挾泥沙一入運河易致淤墊

非甚不得已不可輕爲此遷就之計嘉慶十五年十二月十九日諭河臣陳鳳翔曰因利漕先已病河權其輕重甯使暫時剝運渡黃必不可復用借黃濟運之計各等因欽此道光五年洪湖潰洩兩江督臣孫玉庭等復議引黃濟運敗渡之後卽見填淤起剝磨淺卒至未終其事是

歷朝聖訓昭垂至明至確往事覆車可爲永鑒今張秋運河寬僅數丈兩岸廢土如山若引重濁之黃以開塹節宣用之水勢擡高其淤倍速人力幾何安能挑此日進之沙且所挑之沙仍堆於積年廢土之上雨淋風蕩河底日高開亦壅塞久之黃必難引明臣萬表劉天和等僉以此事害多於利非淤卽決譬之以病爲藥以狼兵止寇語殊痛切宏治初年荆隆口銅瓦礮等處屢次大決皆先因引黃濟張秋之運遂致導隙濫觴臨清地勢低於張秋數丈

而必以後無掣溜河之害臣亦不敢信也至霍家橋堵口築隄工程尤不易辦該處本非決口乃大溜經行之地兩頭無隄無岸一望浮沙並無真土可取若興作於茫茫沙水之中目前無從起手無從立腳卽勉強築沙堆隄節節溜下做竊恐浮沙易塌適足掣河之怒而所耗實多日後防守難資終爲痼疾一遭潰陷水仍別穿運道而不專會張秋豈非全功盡棄至同知蔣作錦所擬導衛濟運原因張秋以北無清水灌運故爲此議惟查元村集迤南有黃河故道地多積沙施工不易且以全淮之強不能敵黃尙致倒灌停淤一清淺之衛遂能禦黃濟運耶彼其意蓋笑取山東諸水濟運之法不知泰山之陽水皆西流因勢利導十六州縣一百八十泉之水源旺派多自足濟運衛水來源甚弱北流最順今必屈曲注之南行一水何能兩分其勢實多不便況平時淺可



膠舟漲時極其渾濁若攔河作閘遏水一遇伏秋盛漲閘必衝決  
新渠必淤卽幸不決不淤而使上駛之蘆鹽下運之豫糧及來往  
商船皆停阻於河而聽命於閘勢不能行若令蘆鹽改由臨清運  
河入豫則三省鹽綱紊亂窒礙尤多若欲分沁入衛以助其源而  
沁水猛濁一發難收昔人已有所戒豫民必多驚惶若必多方更  
變另謀引水灌運必至如南河清口故事徒增漏卮無可持久此  
借黃濟運及築隄東水工程均無把握與導衛濟運難行之實在  
情形也惟河旣不能挽復故道則東境財賦有傷水利有礙城池  
難於移置鹽場間被漫淹如撫臣丁寶楨所奏各節均屬可慮臣  
查大清河源寬不過十餘丈今自東阿魚山下至利津河道已刷  
寬半里餘冬春水涸尙深二三丈岸高水面又二三丈是大汛時  
河槽能容水五六丈矣奔騰迅疾水行地中此人力莫可挽回之

事亦時祀以求而不易得之事目下北岸自齊河至利津南岸齊東蒲臺民間皆接築護埝連邇不斷雖高僅丈許詢之士人每有漲溢出槽不過數尺尚可抵禦並無開口奪溜之事倍險之水如蒲江等河亦經擇要築隄汛至則漲汛過則消受災不重至如齊河濟陽齊東蒲臺利津各縣城近臨河岸十九年來幸官民防守無恙以後可守則守不可守則遷似應隨時相勢設施若於此時驟議遷徙經費無籌民情難喻無此辦法惟聊城一縣地本窪下現已淪沒水中須籌移置東省鹽場在海口者雖受黃淤產鹽不旺經撫臣竭力經營南運膠萊之鹽時爲接濟引地無虞淡食惟盤剝多費價值稍昂耳夫河在東省固不能云無害但得地方官補偏救弊設法維持尙不至爲大患昔乾隆十八年銅山決口不能收功尙書孫家淦曾有分河入大清之疏乾隆四十六年蘭陽

大功屢敗垂成大學士稽璜又有改河行大清之疏此外裴曰修錢大昕胡宗緒孫星衍魏源諸臣議者更多其時河未能北流尙欲挽使北流今河自北流乃轉欲挽使南流豈非拂逆水性恭讀嘉慶十六年八月十二日

上諭南河近年以來年年漫口前此已糜費三千餘萬均經竭力措支辦理毫無成效今復鉅工疊出數將千萬國家豈能以有制之帑金注無常之漏卮等因欽此大抵南河堵築一次通計約費七八百萬歲修約七百餘萬統計工需已在宗祿名糧民欠之上實爲無底之壑蓋因河身日高水行不順雖窮天下之力而不能必保安瀾今河北徙近二十年未有大變亦未多費巨款比之往代已屬幸事且環拱

神京尤得形勝自咸豐五年銅瓦鎮東決後輿捻諸逆屢擾曹濟

幾無虛日未能過河一步而直東北岸防堵有所憑依稍省兵力  
更爲

畿輔百世之利此兩相比較河在東雖不亟治而後患稍輕河回  
南卽能大治而後患甚重之實在情形也近世治河兼言利運遂  
致兩難率無長策元明大河南行始能開會通以運漕至河北徙  
則無如運何斷雖一治而兩全事窮則變變則通爲今之計似不  
得不出於河自河漕自漕現在議漕政者鮮不以規復舊章爲望  
然此兩言可以決耳運河有水可漕無水則不可漕水能分其自  
然之有餘者如南旺之制則可漕反是則不可漕同治初年大溜  
全趨張秋尙能漕運嗣溜勢南滾運隄節節穿斷漕船繞坡河至  
八里廟而黃水不能入運不得已引溝塍雨水逐段倒塘灌放艱  
險已極豈可一再嘗試卽運河黃淤歲積歲挑亦難久行若以全

酒阻聚河干俸此無常之水其所害又非徒勞費已也若如前人所議酒船順河而東由利津渡海入天津取道固捷但江船不能涉河河船不能放洋勢難強爲若仿前代置倉轉搬之法建倉設官一不得人便滋流弊而由張秋至臨清陸輓二百餘里車馬盤兌之繁費陰雨霉變之折耗何可勝計且北路亦無許多剝船可備接運反覆籌維竟無別有利運之術臣愚以爲

天庾正賦惟蘇浙爲大宗

國家治安之道尤以海防爲重當今沿海數千里洋船駢集爲千古以來創局已不能閉關自治正不妨借海道轉輸之便逐漸推廣以擴商路而實軍儲蘇浙漕糧現既統由海運臣前招致華商購造輪船搭運頗有成效江廣等省自軍興後奏改減價折漕民心大定若復徵解本色苦於運費無措加之於民則必滋事變取

之於公又無此閒款似應暫准照章折解仍由各督撫隨時體察情形如可酌提本色若干石卽運滬山海船解津較爲便速如京倉尙有不足更隨時指撥漕折銀兩由南省采買運津或派員在天津招商采辦亦尙合算應請

旨敕下戶部從長計議妥籌辦理至運道雖不能暢通河務亦未可全廢此時治河之法不外古人因水所在增立隄防一語查北岸張秋以上至開州境二百餘里有古大金隄可恃爲固張秋以下抵利津海口八百餘里水深應由山東撫臣隨時飭將原有民埧保護加培南岸自安山下抵利津多傍泰山之麓誠爲天然屏障惟安山以上至曹州府境二百餘里地形較窪爲古鉅野澤卽宋時八百里之梁山泊也自宋元迄我朝凡河決入大清之年無不由此旁注門單鉅野金鄉各邑甚至

谷湖併運漫溢數十州縣波及徐淮爲害甚烈其候家林決口現雖堵築堅固惟上下一百餘里之民埵高者丈餘低者數尺斷難久恃此處若有一失則連南之運道水櫃復被衝淤廬舍民田更遭蕩析其患不可勝言且黃河流分勢緩北路原行通暢入海之道亦恐漸形淤淺或生他變相應請

行較下山東撫臣丁寶楨於秋汛後悉心勘估酌籌款項將候家林上下民埵仿照官隄辦法一律加高培厚若能接築至曹郡西南貴成地方即委設法守護更爲久遠之計沿河各州縣民人田地淪入正河身十餘年情殊可憫應查明分別蠲緩錢糧海口鹽場商運各事並隨時酌量變通妥辦又銅瓦廬決口現已衝寬十里水勢猶日向東埝刷若不設法約攔久必泛濫南趨至於決口以下蘭儀東明境內地勢平行現雖刷有溝槽而中洪不深大汛

漫灘仍東西坍塌漲不定亦不可無遙隄以杜竄越擬請

敕下河東督臣喬松年就近察看形勢應如何量築隄埝與東省  
曹州之隄相接俾資周防而期順軌綜計自安山上至銅瓦鑊決  
口接築南隄距北金隄約六七十里作遙爲遮攔之勢去水較遠  
取土較易工費較省此六七十里中大水所常漫者不過二三十  
里所急流者不過三五里任其游波蕩漾寬緩水勢以漸趨下游  
寬半里深數丈之大清河綏急得以節宣不致偪激衝突別尋去  
路斯爲穩著其隄內民田仍可隨時視溜勢之遠近地勢之  
高低搶種麥禾不至全無收穫似於民生亦無大礙至淮徐故道  
涸出舊河身千數百里水不復行居民佔種年年豐收並請  
敕下江蘇河南山東各省撫分委委員會同地方官查明酌議升  
科以免私墾爭奪之患所有遵



旨辭議黃連兩河情形謹具符見詳細據實覆陳是否有當伏乞  
皇上聖鑒訓示謹  
奏

請行海運片

同治十二年閏六月初三日

再自今黃河北徙河運一廢不可再復凡識時務者皆知之任事諸臣或謂應復淮徐故道或謂宜就東境東水濟運皆於無可如何之中作萬有一然之想實與神禹治水行所無事之大旨相悖既不免於弊必爲之無成臣正摺內已言之詳矣臣奏令江北漕糧每年由運河試解赴通亦欲羈縻運道使不遽廢起見無如年復一年自安山至張秋臨清三百里閒情形日變險阻疊出近歲黃漲入運可資浮送者爲時極暫同治九年十一年黃汛始終並未灌運遂改用陸運輿搶蓄雨水二策艱難危險之狀慨可想見卽能運通亦僅十萬石內外究於倉儲漕政何裨久之試辦者必至不能辦而止臣於覆疏內請仍推廣海運蓋就其易且大者言之而議者又不免驚詫其實自道光六年創辦海運以濟河運

之窮咸豐以後無年不出海運無年不兼采辦京倉命脈賴以維繫顧習焉不察耳今南北宦商往來率以海舶爲通衢捷徑獨至運糧則有戒心將謂夷情叵測豈肯舍各口通商而無端開衅將謂沙船短缺何難借官商輪船而自顧本根就中國洋面運中國官糧外人斷不敢欺侮卽有他變我停運而彼亦須停貿易洋人不若是愚也若慮緩急之閒京儲匱乏似應於無事時多籌起運多方采買使數年中得有一年之蓄內顧可以無虞查嘉慶年間大學士劉權之奏言南漕運抵京倉綜計公私費用每石需銀十八兩積弊相沿實爲秕政今人皆欲復河運殊不知河運之病國病民至此海運費大減而運極速固倍省於河運矣至江浙采買成案每石連水腳剝價銀不過二兩七八錢視海運正漕尤省昨與輪船招商局紳董籌議除每年搭運蘇浙正漕外若遵照采

買定價領銀赴南省產米地方購運若干石於正供完後逕解赴  
通交收不致貽誤如奉

允行再飭議章程咨部覈辦

國家但移河費運費爲之節省其餘以併力於海防斯本末並治  
富強可馴致矣合再附片具陳伏乞

聖鑒訓示謹

奏

慶祺請附祀僧王祠片

同治十二年閏六月二十日

再據天津道府詳據天津縣紳士前浙江布政使沈兆澐等聯名稟稱原任直隸督臣宗室慶祺於咸豐三年倉場侍郎任內來津驗收海運米石適粵逆竄近奉

命留津專辦巡防事宜天津爲水陸要衝近京門戶賊屢窺犯力保危局嗣賊由津郡敗竄靜海獨流鎮旋踞連鎮先後與科爾沁忠親王僧格林沁分兵勦擊扼其竄路五年協同克復連鎮全股蕩平計賊在獨流連鎮爲時甚久距津非遙津城得以安堵實科爾沁忠親王與該故督臣之力八年補授直隸總督又值海疆有事津郡戒嚴復與科爾沁忠親王籌防布置謀慮深遠多所維持詎心力交瘁積勞成疾歿於天津行營遠近同聲感泣今科爾沁忠親王津郡專祠落成追思患難之際該故督臣同辦一事功不

可泯籲懇附祀以資報獎等情轉詳前來臣查原任督臣慶祺前  
在天津一帶歷辦防剿捍患保民以死勤事該紳等請附祀僧格  
林沁專祠出於至誠臣在津訪察該故督臣戰功政蹟實有可紀  
相應仰懇

天恩俯賜照准以彰勞勩而順輿情所有津郡紳民籲請附祀已  
故督臣緣由理合附片具陳伏乞

聖鑒訓示謹

奏

長蘆復價仍請減收摺

同治十二年閏六月二十日

奏爲長蘆軍需復價仍照原議減收恭摺仰祈

聖鑒事竊臣前於同治十年正月奏請停減長蘆額引等項摺內  
擬將撥放保定練餉津郡防餉之軍需復價一款原收外引五錢  
者減爲四錢京引二錢五分者減爲二錢以恤商艱經戶部以練  
餉防費歲需銀二十三萬餘兩全恃復價應再通盤酌量如此次  
議減後尙可敷用不致挪動正課亦無須另籌撥款准如所請減  
收俟覆奏到日核辦等因奉

旨依議欽此

臣維長蘆復價項下歲撥保定練餉銀十三萬二千

兩津郡防餉銀十萬兩原議按外引減去一錢京引減去五分徵  
收再加催繳舊欠可資周轉係就彼時情形而論詎十年十一年  
連遭大水生鹽歉收熟鹽沖沒成本過重道途淹滯運腳倍增遂

致商累益甚新課尙須展限欠款勢難措交欲令復價仍按原額不爲量減實係力不能支因與各司道將津保兩處餉需通盤核算津郡海防支應局除撥海關六成洋稅洋藥釐捐並東海關協餉外必需歲撥復價十萬兩方敷支發應仍照舊撥濟其保定練餉局除部撥固本餉江蘇海關協餉並將藩庫底餉按時籌撥再有歲撥復價十萬兩卽敷助支計每年可減去保定練餉銀三萬二千兩當於上年六月起分飭照數減撥咨部有案現計復價項下歲撥兩處餉需二十萬兩以近五年出庫之引多寡牽算每年約及五十三萬道仍照原議外引暫減爲四錢京引暫減爲二錢雖春秋關收數不同而截長補短先後勻撥每年可有二十萬兩並改爲隨引全數完交不予分限以免拖欠其舊欠銀兩仍隨時酌量催徵設遇領引較少卽以此項湊撥尙不致挪動正課如不



添練增費亦無格外開銷無須另籌撥款飭庫運司成孚詳報卽  
自本年春關起隨引減收稍舒商力仍俟數年後察看情形再行  
酌核辦理所有蘆鹽復價照原議減收緣由理合恭摺覆陳伏乞  
皇上聖鑒敕部知照謹  
奏

長蘆白絲請派產絲省分摺

同治十二年七月二十一日

奏爲內務府擬派長蘆白絲無從采辦請另派產絲省分辦解恭摺仰祈

聖鑒事竊准內務府咨開每年分派江南蘇州織造大運絨綾絲斤等項辦解未能足數現在庫存白絲不敷應用奏明擬派長蘆采辦三千斤解京濟用作正開銷等因當經行司遵照去後茲據長蘆運司覺羅成孚詳稱直隸天氣較寒地土多瘠素無蠶桑之利間有種桑養蠶之戶僅得土絲不特價值極昂且質粗色黑斷不適用所有奉派白絲實屬無從采辦向來內務府亦無派辦絲斤之案請另派產絲省分辦解等情前來臣查各省物產本自異宜未可強致直隸向無白絲近年商情苦累運庫支絀萬分亦實無力采辦相應仰懇

天恩免其派辦仍

敕下內務府將此次絲斤另派產絲省分辨解以期合用而免貽誤理合恭摺具陳伏乞

皇上聖鑒訓示謹

奏

上屆賑需續收捐數摺

同治十二年七月二十一日

奏爲查明上屆直隸賑需續收捐數恭摺仰祈

聖鑒事竊同治十年直屬被水成災經臣奏明勸捐濟賑援照天津捐米章程給與獎敘業將十一年六月以前收捐銀錢米糧棉衣截數奏報並將官紳捐戶分別奏咨給獎在案茲查十一年七月起至本年五月止續收官紳捐賑銀四萬四千二百三十二兩三錢五分三釐七毫大米二千四百四十石八斗八升每石合銀二兩五錢計銀六千一百二兩二錢小米四千九百三十二石五斗四升五合每石合銀一兩八錢計銀八千八百七十八兩五錢八分一釐棉衣七萬一千六十五件每件合銀一兩計銀七萬一千六十五兩統計捐銀十三萬二百七十八兩一錢三分四釐七毫業經歸入十一年賑撫案內陸續核實撥放應與原收捐款併

案給獎此外尙有捐修城垣以工代賑之處前已奏明仍歸賑捐核獎應俟事竣彙辦查前項續捐內有蘇州織造德壽先後捐助棉衣五千五百件合銀五千五百兩該前織造已有二品頂戴無可再加應請

旨敕下內務府查明其子職名照例核給獎敘以示鼓勵據籌賑局司道具詳前來除飭查取官紳捐戶履歷分批咨部給獎並俟各屬詳送支銷實數到日彙案核辦外理合恭摺具陳伏乞

皇上聖鑒訓示謹  
奏

酌定各省協賑摺 同治十一年八月初三日

奏為遵

旨酌定東南各省協撥直屬賑款並陳災歉籌辦大概情形恭摺  
仰祈

聖鑒事竊臣接准部咨同治十二年七月二十日奉

上諭本年夏間雨水過多永定河南岸決口被水地方田廬多被  
衝沒小民蕩析離居殊深憫惻前據順天府奏請截留漕糧八萬  
石備賑當經降旨允准因思畿輔被災甚廣亟應妥籌撫恤著加  
恩於東南各省釐金關稅鹽課項下合撥銀三四十萬兩以資賑  
濟山李鴻章酌定各省應解數目一而於直隸藩庫運關各庫內  
無論何款先行動支俟各省解到時歸款其順天所屬應需賑濟  
銀兩若干卽於此款內撥給並著李鴻章會商萬青藜彭祖賢奏

明辦理該總督府尹務當督飭地方官查明被災戶口核實散放  
妥爲賑恤總期實惠及民毋令一夫失所用副朕軫念災黎至意  
該部知道欽此仰見

聖主體念時艱亟籌拯救

天恩高厚寰宇同欽伏查直隸地方本年麥收中稔大田均已播  
種六月間得雨深透乃竟連旬不止各處隄河廢弛已久近歲僅  
能量籌補苴尋常雨水尙可容納今則彌月大雨西北口外及直  
晉豫諸山之水奔騰匯注各河同時異漲處處出槽漫溢平地間  
六月十五日永定河南四工九號漫口水由固安霸州一帶東下  
當經奏報參辦卽委員馳往會同該河道勘籌搶堵而潮白溫榆  
薊運拒馬等河亦多衝決順屬近山沿河州縣皆受水害大清瀾  
龍潭沱漳衛等河經過新城雄縣安州蠡縣高陽安平饒陽河間

獻縣任邱保定霸州元城大名吳橋交河青縣靜海衝勢頗甚文  
安大城勢更窪下引河因積淤甚深工未及半水至復遭淹沒然  
緒龍河有新修南隄渾水不能橫灌西淀有新挑趙王河盛漲稍  
資減洩大清河半以盛似中亭兩河爲出路中亭洩水頗利惜盛  
似工尚未竣又被衝淤天津各河雖甚涌溢幸先加築隄工略資  
塘護無如萬派之水總匯一隅僅賴海河一道迴瀾出口勢難暢  
達夏初山陳家溝疏濬淮魚淀引河冀山北塘口分洩歸海因費  
絀未能深挑自七月初上游諸河滔滔下注津郡周圍百數十里  
一片汪洋海潮正盛朝夕頂托不得歸壚三岔河上下及南北運  
河隄段極形危險臣督飭文武暨練軍防營分投竭力搶護加高  
子埝至三四尺而水與埝平七月十九日西北風狂暴鼓浪掀騰  
漫過隄頂數尺人力難施竟將連隄東岸衝刷數口水注南窪村



莊禾稼多被淹浸約計天河保定三府屬天津靜海安州雄縣受  
災爲重河間獻縣任邱蠡縣高陽新城青縣滄州交河東光吳橋  
等處災歉不等餘則情形尙輕西南各府州及永遵所屬閒有被  
水較重現尙未據報齊地方連遭災祲總由臣等奉職無狀未能  
先事補救撫躬循省悚懼莫名惟成災稍遲江浙漕米已全數抵  
通未便再截本省尙係缺額無從羅掘上屆南省捐項又早用罄  
賑需無措正擬籲懇

鴻施仰蒙

恩命特頒於東南各省釐金關稅照課項下合撥銀三四十萬兩  
令臣酌定各省應解數目先行籌款墊辦凡有血氣之倫孰不聞  
詔書而感泣因思東南各省本係財賦之區祇以兵燹之後元氣  
未蘇京協各餉籌解已形竭蹶惟

畿疆重災疊困情形萬竄除此協撥之外實亦無可設措臣等任  
兩江湖底卽閩浙廣東等省盈絀亦略知梗概謹遵

旨察度各該省財力酌定應解數目請撥江蘇江海關洋稅銀五  
萬兩甯蘇滬三局釐金各銀一萬兩江安糧道庫節存酒項銀二  
萬兩共十萬兩江西釐金銀五萬兩九江關常洋稅銀三萬兩共  
八萬兩湖北江漢關洋稅銀三萬兩釐金銀三萬兩共六萬兩浙  
江釐金銀三萬兩浙海關洋稅銀二萬兩共五萬兩福建稅釐銀  
五萬兩廣東鹽課銀五萬兩安徽釐金銀一萬兩統共東南七省  
合撥銀四十萬兩各省但勉爲其難臣處卽有所指望諒各督撫  
臣公忠體

國深知

畿輔收荒出自

特恩非常協款可比必能並濟兼籌共維大局臣已詳飭司道  
無論何款設法籌墊先應急需惟錢糧鹽課尚未啟徵卽徵起亦  
應就款解支關稅短收又另有抵用斷難虛懸久待應請  
救下各該督撫臣飭屬迅速照數通融籌撥務於冬初解到以資  
接濟而歸墊款臣現派員分赴奉天牛莊河南道口等處采買雜  
糧爲直屬賑撫之需仍照上屆奏案免徵釐稅並疊飭司道府分  
督印委親履查勘實在災歉村莊核定分數據實稟辦其災重處  
所已先籌款派員酌量撫恤永定河漫口亦經撥款開工搶堵可  
期早日合龍津河各隄並飭趕緊築堵上游各處隄河又經此次  
大水衝缺淤墊甚多若任其廢弛嗣後卽水小之年難免漫溢必  
須擇要修治天津附近仍擬添開引河冀其暢洩歸海庶下不壅  
則上不潰統計工費繁鉅臣力雖不足以兼營而既顧目前尤防

後患惟有工賑並舉俾災黎藉資傭趁要工亦不至誤時統俟查明災分併核奏辦現在節逾秋分海已收水上游河流逐漸消滅仍飭各地方官實力疏導積水以期無誤種麥其順屬賑銀昨准府尹臣兩商計需八萬兩應於協款內分批墊撥凡賑撫事宜當與府尹臣謹遵續奉

諭旨嚴督官紳認真稽查核實經理務使實惠均霑備官紳稍有侵冒卽行從嚴參辦除分別咨行外所有遵

旨酌定東南各省協撥直屬賑需並災歉籌辦大概情形理合會同兼管順天府府尹臣萬壽馨順天府府尹臣彭祖賢恭摺具陳伏乞

皇上聖鑒訓示謹

奏

籌撥官兵赴烏協防摺

同治十二年八月初三日

奏爲遵

旨酌度緩急籌撥宣化官兵赴烏城協防恭摺陳仰祈

聖鑒事竊臣承准軍機大臣字寄同治十二年七月十六日奉

上諭常順奏賊氛北竄馬隊遞難移撥一摺據稱探報陝回大股

出關北竄匪蹤擾及阿畢爾米特游牧現飭官兵探勘懇請調

勁旅迅速來烏再令黑龍江馬隊西進等語著李鴻章於宣化官

兵內挑選五百名剋日整隊赴烏前據李鴻章奏直省練軍未便

再議抽調惟現在關外軍情緊要該督務當酌度緩急迅行調派

勿稍遲延等因欽此當卽恭錄轉飭宣化鎮總兵王可陞欽遵妥

辦茲據該鎮稟稱宣化練兵僅存七百餘名底營官兵數亦無多

邊口內外巡防緊要正慮分布不敷勢難照數抽調惟查烏城額

駐換防宣化官兵二百十一名上班額外暫留十六名共計二百二十七名現屆班滿輪應換防復由宣化鎮挑定馬步官兵一百四名由口北道支給米折鹽菜借支等項襄辦行糧聽候頒給支牌路照即可起程惟向來換防應由山西大同出口道路迂遠冰雪阻滯須來年二三月間到防此次烏城待兵孔亟所有宣大兩鎮換防官兵應請均改由張家口臺站行走照例供給駝隻約計月餘即可迅抵烏城至班滿應換未回宣化官兵一百四名在烏有年通曉蒙情熟習蒙語亦請暫留烏城作爲此次抽調征兵與現到換防官兵一同駐守以厚兵力此外無可再議抽調等情稟請核辦前來臣查宣化一鎮東鄰熱河西通晉隴直達歸綏北抵察哈爾沙漠游牧邊疆絲互幾逾千里實爲近畿重鎮本年正月臣以宣化古北均爲北邊緊要門戶近來口外多事尤應酌留重

兵稍壯聲勢奏蒙

聖鑒在案昨因奉天馬賊竄擾熱河商調古北口馬隊往剿難保無漏網逸匪乘隙思逞近邊一帶必應嚴防躡緝今陝回大股出關擾及阿畢爾米特游牧間該處居三音諾彥部落適中之地賊蹤飄忽或西向烏城或分趨東南均在意中張獨二口近扼邊牆多倫廳孤懸口外五百餘里均形喫重目前思患預防不特宣化官兵未可全調卽古北口練軍僅存千餘亦未便抽調遠戍庶兩軍聲勢連絡設有緩急尙資捍禦該鎮擬請將烏城額駐宣化防兵二百二十七名及現由宣鎮挑定換班官兵一百四名均暫留烏城作爲此次抽調征兵連大同換防官兵計之烏城防守稍資布置亦可收駕熟就輕之效而於近邊守備仍不致過形單弱實於內外防務均有裨益除飭該鎮趕緊籌給行糧督催前項弁兵

剋日起程卽由張家口臺站行走並分咨查照外應請  
旨飭下察哈爾都統轉飭沿途臺站供應駝隻俾利師行其應領  
鹽菜米折借支等項仍由口北糧臺籌發該官兵等到防後一切  
鹽菜口糧卽由烏城按月照章支給所有籌撥宣化官兵赴烏協  
防緣由理合恭摺由驛覆陳伏乞

皇上聖鑒訓示謹  
奏



張家口糧臺請撥餉摺

同治十二年九月初七日

奏爲張家口糧臺懇

恩照案續撥部餉恭摺仰祈

聖鑒事竊查前因烏里雅蘇臺等處調兵防剿遵

旨<sub>臣</sub>在張家口設立糧臺辦運各路軍糧奏明請撥部餉以資接濟

先後由<sub>臣</sub>五次奏撥部餉銀十五萬兩飭委口北道分起辦運並

於十一年年底截數造報在案茲據口北道奎斌稟稱烏里雅蘇

臺烏魯木齊伊犁並察哈爾副都統杜嘎爾所部原調續調察哈

爾吉林黑龍江各起馬隊除撤回事故不計外現有官兵四千四

百餘員名自本年正月起連閏至十二月止共運過各營一年軍

糧一萬三千餘石又運駐紮庫倫之宣化古北口練軍一年米麪

九千四百餘袋其用過米價繩袋羣席運腳並委員薪水雜支等

銀五萬七千九百餘兩上次報銷存款及第五次續領部餉銀兩均已用罄尙在宣化練軍自備米價內借墊銀三千餘兩各路軍糧曾經察哈爾都統奏明分爲夏秋二季雇車雇駝預發半年俾遠道可資周轉現屆九月中旬卽須開辦駝運預送明年春夏二季之米爲期已迫亟應請款起辦免致誤運等情前來臣查該道所稟委係實在情形相應仰懇

天恩敕下戶部照案續撥餉銀三萬兩仍由順天府尹就近派員領解赴張家口糧臺交收以濟要需所有張家口糧臺續請敕撥部餉緣由理合恭摺由驛具陳伏乞

皇上聖鑒訓示謹奏

長蘆南河解款留抵永定摺

同治十二年九月十三日

奏爲永定河歲需經費不敷之數應將長蘆額解南河銀兩就款留抵餘由本省旗租項下添撥恭摺仰祈

聖鑒事竊准戶部咨開兩江督臣李宗羲會奏籌解永定河經費一摺奉

硃批該部知道欽此經部以嗣後每年永定河應需十成經費銀九萬四千七百兩除例撥一半本省旗租銀四萬七千三百餘兩其餘一半銀兩前經議令於南河未裁額解舊款內核定實在數目按年籌解今雖據兩江總督於江甯江蘇各藩庫兩淮運庫每年各籌銀一萬兩但核計尙不敷銀一萬七千三百餘兩應著直隸兩江漕運各總督仍於南河未裁款內設法籌措奏明辦理等因臣查南河舊額歲料等款自黃河改道各省軍用浩繁久已停

解卽江省應解之款早歸別項開銷且地方元氣尙未盡復課款不能如前籌解京協各餉正形竭蹶前以永定河歲需緊要部議奏令江南南河籌撥今兩江督臣等已奏定於蘇甯各藩庫兩淮運庫每年共解銀三萬兩若將不敷之一萬七千三百餘兩再令按年全數添撥竊恐日久無著致誤要需惟查長蘆向有額徵南河工需一款除減停引日扣除參懸截長補短每年約可徵銀七千餘兩卽係南河未裁之款自應就款留抵南河應撥永定河經費連兩江前撥三萬兩作爲每歲共撥銀三萬七千兩所有今年長蘆應徵前項銀兩卽飭提存備撥此係南河未裁之款又以直省蘆課留抵本省工需正與部議相符其餘不敷之一萬三百餘兩江省既無成議只可仍由直隸藩庫旗租項下同例撥一半經費一併設法籌湊足數俾河員及時整修歲需皆有著落庶免歸

時貽誤除分咨查照外理合恭摺陳明伏乞  
皇上聖鑒敕部知照謹  
奏

鹽綱原停引目照案展限摺

同治十二年十月初一日

奏為鹽綱連年被災灘坵引岸屢被淹沒銷路仍滯賠累難堪請將原停引目照案展限五年以恤商艱恭摺仰祈

聖鑒事竊照長蘆直豫兩省引地一百八十五州縣營每年額引九十六萬六千四十六道內道光元年並二十一年兩次停減引十八萬三千五百四十九道又於二十四年疏銷積引案內按照山東省引課併展成案自道光二十三年起每年停引十萬道子限六年銷完積引仍復舊額二十八年並咸豐三年八年同治二年七年五次

奏准推展五年又於同治九年經前任直隸督臣曾國藩具奏長蘆鹽務減輕成本案內准將京商額引減停二萬道自九年子限五年限滿仍復舊額等因各在案所有各商額引自同治八年起

扣至十二年推展年滿卽應復額惟查此五年限內同治八年現  
商銷引五十萬三千二百四十九道九年銷引五十三萬四千三  
百六十六道十年銷引四十七萬九千八百八十二道十一年銷  
引五十八萬七千三百三十九道本年秋關將竣僅領銷引五十  
三萬餘道卽再領運亦甚有限均未敷額定行銷之數各商仍不  
免包賠且同治十年十一年夏秋雨水成災各岸鹽包被淹津坨  
灘鹽亦被衝溢本年河水泛溢決口引地坨鹽被災並重各灘水  
浸日久產鹽甚少價值倍昂車船運腳無不隨時增長本愈重而  
銷愈滯前因商情危困業經

奏准展緩正課減徵軍需復價若再將已停之引遽令復額體察  
情形實屬力有未逮自應撥案推展以舒商力據鹽運使成孚詳  
請具

奏前來臣查直屬連年被災額引銷路愈滯該司所詳委係實情合無仰懇

天恩俯准將蘆綱原停引目十萬道查照歷辦成案自同治十三年起再行推展五年其先後所停引課統俟限滿察看銷市暢滯情形再行分限帶運帶完臣一面督飭運司實力疏銷招認懸岸並嚴飭各屬認真緝私以期漸有起色所有停引限滿仍難復額懇請照案推展緣由理合恭摺具

奏伏乞

皇上聖鑒訓示謹

奏



截留洋稅摺

同治十二年十月十二日

奏爲津海關稅項不敷海防月餉本年京餉難續解援照歷屆成案籲懇留用並請免撥來年洋稅恭摺仰祈

聖鑒事竊臣於同治十一年十一月因津郡餉需不敷支應奏請將津海關短解京餉留用並請將十二年指撥洋稅豫籌改撥原係斟酌時勢力有未遑旋奉部議津海關欠解京餉均准暫留緩俟來年籌補至十二年京餉仍應解部等因當經轉飭遵照在案茲據津海關道陳欽詳稱上年戶部豫撥本年京餉案內指撥該關常稅銀五萬兩洋稅銀十萬兩又本年五月內復飭將招商局輪船稅銀全數解充京餉除鈔關常稅銀四萬九百餘兩已儘數解部外其洋稅銀十萬兩實係無款續解溯查同治九年奉飭籌議天津海防練兵月餉合計津海關六成洋稅洋藥釐捐東海關

協餉等三項以洋稅暢旺時爲率每年約可撥銀二十八萬兩近因直屬災歉頗仍稅釐減色自上年十二月初三日第五十結起至本年八月初九日第五十二結止徵收洋稅銀二十三萬一千八十二兩零除專歸機器局四成並八分經費及一分二釐火耗外核計六成洋稅連招商局輪船扣淨稅銀共止十四萬六千四百十六兩零又自八月初十日至十月初止約徵六成洋稅及招商局輪船稅銀三萬餘兩且洋藥進口較少釐捐一項自上年十二月十六日起至本年九月十五日止僅收銀四萬八千九百餘兩連東海關解到協餉五萬兩綜計各項進款不過二十八萬餘兩而出款自本年正月至九月海防月餉撥發銀二十一萬三千兩連稅務司薪水等項已用過銀二十三萬八千餘兩其本年十十一十二等月暨豫備來年正月軍餉並稅務司應支薪水等

項共應需銀十二萬餘兩皆係刻不容緩計新關現在徵存各項並招商局輪船稅銀一併湊撥不敷尙鉅請將本年未解京餉撥案留用並免再撥來年洋稅等情前來臣查部庫未裕京餉緊要

但可設法籌顧斷不敢有諉延惟天津爲海疆要衝拱衛

京師門戶關係綦重經臣嚴督各營練軍堅築營壘礮臺並以其

暇濬河築隄勞勦勝常驛勢頗壯月需餉項無可節省況劉景芳

帶隊出防綏遠城亦係山津局撥濟該局歲發餉項計需銀四十

萬兩除長蘆運庫復價十萬兩其餘皆指津海關洋稅釐捐爲大

宗頻年災歉稅釐減收支應極形竭蹶今年多一閏月之餉鹽關

絲毫莫措不得已酌留江海關解到省餉三萬兩暫行濟急曾經

咨部有案現屆封河洋稅已無可收卽欲勉強湊支冬季及來年

正月防餉稅務司薪水等項不敷尙鉅正在籌措維艱實無力續

解京餉相應籲懇

天恩俯准將津海關洋稅本年未解京餉銀十萬兩援照歷屆成案留爲海防月餉至津關稅項向較南省各海關爲少而海防較

各通商口岸尤要勢不得不就地籌餉就餉練兵並請

敕下戶部於豫撥來年京餉時免再指撥洋稅俾資周轉而免貽

誤謹據實恭摺具陳伏乞

皇上聖鑒訓示謹

奏

祕魯使臣議約摺  
同治十二年十月十八日

奏爲祕魯國使臣來津瀝求議約現與辯論情形恭摺具陳仰祈  
聖鑒事竊本年春間探聞南亞美理加之祕魯國遣使來日本及  
中國議立和約適日本使臣副島種臣至津換約臣面與詢及據  
稱祕魯已至東洋該使回國後卽與議辦此事六月間接准總理  
衙門函稱英美駐京使臣均以祕魯特派欽差來華商訂通商條  
約請盡力幫助等情因聞祕魯有陵虐華工之事令將華人全行  
送回中國並聲明不准招工方能商議立約當經照覆各國知照  
並屬臣於祕魯使臣到津時與之逐層辯論斟酌辦理旋於七月  
杪接據日本副島來函謂祕魯使臣葛爾西耶已與日本立定和  
約卽赴中國議辦經臣函商總理衙門該使遠來自應以禮接待  
再與辯論公事九月初二日葛爾西耶乘輪船到津初四日來晤

臣卽於翌日前往答拜詢悉華民陸續招往祕魯者有十餘萬人據稱並無陵虐情事該國統領聞外人謠言甚多特派大臣來華議立和約以期共相保護初九日又據該使函送該國洋文公牘三件細加繙閱內係新立雇用華工章程似尙妥協臣覆以前據駐祕魯華民公稟受苦甚多各國新聞紙亦有記載祕魯陵虐華工情形該國雖立有新章恐未能實力遵辦仍照總理衙門照覆英美各使大意令將所招華工全數送回方可商辦二十四日葛爾西耶復來臣署力爲剖辯謂同治八年十年駐祕魯華民轉遞公稟全是空話不足爲憑卽上年日本扣留祕魯招工船隻亦無船主苛待華工確證該國旣派使來華議約如條約立定以後必當照約保護臣遂加駁詰該使總稱此來專爲和約美意若不准立約卽行回國語殊決絕二十六日英國駐京使臣威妥瑪適由

南洋回津拜晤臣處代爲極力調停並云葛使來意甚好原欲商  
議立約保護華工若中國置之不理必爲各國所輕視切不可任  
令回國致難轉圜臣因與總理衙門往復函商祕魯本係無約之  
國已招去粵閩華民十萬餘人該使不肯自認陵虐而於立約一  
事復堅執如初中國向以民命爲重自不能置之不問應派員前  
往該國查明實在有無苛待華工情事再行設法妥辦欲先與會  
議查辦章程不卽作爲條約以冀層遞折落或可就我範圍十月  
十三日該使葛爾西耶復遞來照會一件詞意冗複狡辯多端大  
致謂華民在祕魯者保護與不保護全係立約與不立約欲得一  
言以定行止臣思急脈緩受仍詳晰照覆該使允先派員往查並  
擬具查辦章程四條屬再面晤商訂俟察看該使如何答覆函商  
總理衙門相機妥辦再行具陳除將祕魯使臣照會一件及臣照

覆該使一件鈔稿咨送軍機處備查外所有祕魯使臣來津演求  
議約現與辯論情形理合繕摺由驛馳陳伏乞

皇上聖鑒訓示謹

奏



統籌工賑事宜摺

同治十二年十月二十七日

奏為遵

旨統籌直隸應辦河工費款過鉅東南各省市撥賑需擬緩俟來  
年再行酌請添撥現添提藩庫銀兩先辦尾閘各工恭摺仰祈  
聖鑒事竊臣前奉八月二十二日

寄諭內閣學士朱晉奏近畿連年被水請飭以工代賑一摺據稱  
直隸河道漫溢連歲水災與其併力籌賑不如擇要修工請飭該  
督以現撥帑金酌提一半拯恤災區以一半起擇河道緊要者速  
為修治工賑兼施兩收其效至現撥帑金尙不敷用並飭續撥款  
項以成鉅工等語近年以來直省河患頻仍亟宜設法疏治期於  
一勞永逸至朱晉所陳辦法是否可行著李鴻章統籌全局悉心  
酌核迅速具奏原摺著鈔給閱看等因欽此臣維直隸七十餘河

而大者有五曰永定河滹沱河大清河北運河南運河皆各容納  
眾流勢兼力猛或地處狹窄或挾沙壅泥既易淤復多泛濫雍  
正乾隆年間節次大加修治皆費數百萬之帑歷十餘年之功始  
有成效嘉道以後經費不支未能大修咸豐以後軍需繁鉅南  
北運河歲費屢遞減撥永定河歲修要款亦減而又減於是河務  
廢弛日甚間墾堤埝無一不壞減河引河無一不塞此五大河者  
受病同深每遇積雨盛漲橫衝四溢併歸窪區連成一片正不獨  
永定一河之爲害而天津係各河下游總匯僅有海河一道迤邐  
出口不能暢達尤爲全局之病無論近數年雨水過大成災較廣  
卽水小之年亦必難免漫淹是各河之皆應及時修治無待再計  
矣臣抵直以來幾經籌畫竊念本省向係缺額無可經費部庫尙  
屬空虛外省僅能自顧勢難籲請惟於上兩年災案內勻撥賑款

量爲補苴節經奏報有案今年水災蒙

救撥東南各省協款臣於八月初酌定銀數請撥捐內亦經陳明  
工賑並舉擬添開天津歸海引河並擇辦上游隄河各工在案直  
省河道一日不治水患一日不息民困一日不蘇臣忝任畿疆時  
深疚悚明知頻年賑卹調豁所費實多斷非長策而各河淤廢太  
久工程太鉅較雍正乾隆年間尤甚若設法疏治期於一勞永逸  
亦非數十萬金所能濟事宋晉以撥款不敷請再續撥以成鉅工  
洵屬切要之論惟東南各省兵燹後民力已窮元氣未復京餉既  
關緊要西路軍需各處防餉皆不能或省

萬年吉地甫經興工又須分批勻撥各該省兼籌並顧竭蹶未遑  
前撥直省賑款臣疊經咨商懇因奉

特恩爲畿輔救荒要需勉力措解然拮据之狀往往形於來牘目

下若再添撥誠恐周轉不開或致顧此失彼似只可斟酌緩急逐漸舉辦俟來年察度情形如必不可已之工再行酌量奏撥庶各省財力稍得展舒而直省河務亦不任偏廢至天津引河應自三岔河口陳家溝開挖起至北塘歸海使通省尾閘多一分洩之路工段過長約估需銀十五萬兩其大清河上下游緊要隄河及文安大窪引河河間獻縣滹沱引河或工已及半或情形太重皆應先辦計尙需銀十四萬兩均擬明春興作以工代賑俾災黎藉資傭趁查今年各省協款銀四十萬兩除去順屬賑銀八萬兩府尹與倉場侍郎商撥潮白河工程銀二萬兩永定河漫口工費銀八千兩直屬采買賑糧銀七萬兩分撥各州縣賑撫銀六萬五千兩僅賸銀十五萬七千兩以之撥作前項工需尙短銀十三萬餘兩臣不得已商飭藩司移緩就急在於司庫地丁項下湊撥銀十萬

兩以助工賑要需仰懇

天恩俯准提用其不敷之數卽由南省賑捐尾款及練錢生息海關新增洋藥釐各項儘力湊濟仍俟事竣照案彙開清單奏報所有統籌工賑事宜理合恭摺覆陳伏乞

皇上聖鑒訓示謹

奏

回省日期片

同治十二年十月二十七日

再祕魯使臣來津辯論情形經臣於十月十八日專摺奏明在案該使葛爾西耶接臣照覆復訂期二十日來臣署晤商當與詳切開導該使仍多方狡辯必欲允立和約而於臣所擬先訂章程派員查辦各節堅執不從會議數時之久往返駁辯未能就緒先是十月初間經准總理衙門函稱英使威妥瑪已向總署議准祕魯使臣赴京暫住祇算英法兩公使友誼不與商辦公事來春再令赴津等因現在節屆冬至北河業已凍封臣應辦公務甚多必須照例回省未便爲祕魯一事久留津門該使亦面稱卽日料理進京將來如何議辦之處想總理衙門王大臣必能相機妥籌臣擬於二十九日由津起程回省理合附片具陳伏乞

聖鑒謹

奏

鹽商公櫃撥借成本摺

同治十二年十月二十七日

奏為蘆鹽京商復設公櫃資本不敷擬借給練餉錢文分年免息還本以恤商艱精顧課帑恭摺具陳仰祈

聖鑒事竊查長蘆京綱引商殷眾不齊事極散漫往往減價賤售

虧折課本掣動全局從前設有公櫃總司整飭係各商湊集資本

凡運京之鹽皆歸公櫃不論殷商眾商照章一律運到付銀既敷

課本亦有餘利公櫃賣鹽有一定之價人不能勒指居奇各商既

免賤售虧折即可陸續行運民無淡食法至善也道光三十年經

管公櫃之總催徐春霖斥革後各商按年輪流經營為時既暫責

任不專從此逐漸廢弛遂將公櫃裁撤皆歸自運自銷累商因賣

鹽需時急欲得價多賤售於油鹽店不計虧折課本該店復乘勢

勒捐圖佔便宜殷商即被牽掣年復一年引愈滯而課愈虧運既



不時民虞淡食油鹽店益奇貨可居前督臣曾國藩奏准減停滯  
引二萬道限期將滿仍無起色實因事權不一紛紛賤售虧折之  
故若不亟籌變通殊無以善其後查

京師爲根本重地京引乃長蘆綱領必須復設公櫃官督商辦力  
圖挽救前據京引總催姚學源等稟經運司派員偕同該總催及  
京引各商議定公櫃章程以姚學源承辦商人王源濤幫辦並由  
司委蒯永分司運判王鍾練候補鹽大使德馨督辦惟資本甚鉅  
商力疲累難以全數措齊請在江浙興商借賸練餉錢文內借給  
制錢五萬串以助公櫃資本體恤商艱藉顧課帑與江浙興商借  
款自謀生業者不同並懇免息還本庶符調劑本意其成本即自  
來年起分作四年由少至多次第繳清由姚學源王源濤承領承  
還並由京引商人及督辦委員出具切實保狀儘局限不還著落

原保各商攤賠督辦委員併干參處至江浙典商借款原議一經奉提限三箇月內繳清因有數十萬串爲數太鉅必豫籌提用以備緩急今借款無多尙非待以應用四年還清限期亦迫應免隨時提繳俾資周轉當經據情咨請戶部核覆茲准部咨以復設公櫃齊價定章事歸登一係爲力挽頽綱起見惟江浙典商請借練餉錢文均經奏奉准行今借給京商公櫃資本並寬免息錢分年完本應由臣專摺具奏等因臣查京商情形非復設公櫃無以除賤售虧折即不能顧全課帑但公櫃資本甚鉅商力困窮不得不酌籌撥濟該運司成孚所擬借給練餉制錢五萬串分作四年免息還本爲數既屬有限體恤亦逾尋常該商等感戴

寬仁自必如期呈繳況屆限不還著落保商攤賠並將督辦委員參處層層鈐制斷不至有虧欠相應仰懇

天恩俯賜照准除飭運司責成委員督同實力整頓並將其餘事宜逐款妥議咨部立案外理合恭摺具陳伏乞  
皇上聖鑒訓示敕部知照謹  
奏

豫籌橋道事宜摺

同治十二年十一月初八日

奏爲遵

旨豫籌明春

恭謁

西陵道路橋梁各事宜體察情形據實覆陳仰祈

聖鑒事竊臣前准軍機大臣字寄九月二十七日奉

上諭明歲新正當降旨恭謁

西陵惟來年清明節氣較早俟降旨後修墊道路橋梁恐難如期趕辦今冬農隙能否次第興工直隸今歲被水道路能否暢行此項工程不能不藉資民力尤恐被災處所民力難支均著該督酌度情形據實具奏等因欽此仰見我

皇上禮隆孝養懋舉

上儀仍慮及災區民力難支備加

體恤欽感莫名當卽行司遴派大員前往逐細查勘酌度稟覆臣  
由津回省途次又欽奉十月二十九日

寄諭催詢臣益增悚急十一月初三日行抵保定省城卽與藩臬  
兩司悉心籌議自咸豐五年恭辦

西陵大差以後迄今已十八年經由州縣橋梁道路地盤等工久  
失修治本不免坑窪冲塌之處況連歲大水所有良鄉房山涑水  
易州一帶切近山根輾經伏秋霖雨山水下注河道多有變遷  
蹕路更難修整正在躊躇莫決間適藩司孫觀所派知府恭鈞張  
保泰會同各該牧令查勘回省繪呈圖說臣詳加察覈據該員等  
周歷履勘從前  
御道及

尖營地盤或有冲成河溝變爲水窪淤沙泥淖所在多有必須開  
段繞越改移修墊大致與舊道里數尙無甚增減惟自黃新莊至  
半壁店中有房山縣屬之馬家溝至吉陽村等處最爲窪濫計改  
道須多繞十里有客又易州良各莊迤西香兒峪下近三里大道  
已成淵溝若向南山營汛地面改修須繞遠三里餘此外添建橋  
梁涵洞培墊馬頭地基築壩辟水創沙除石較昔年工程多至倍  
徙其艱難情形概可想見惟事關謁

陵大典仰體

聖孝至誠凡在臣民莫不竭蹶將事曷敢畏難阻延來年二月十  
九日節屆清明計距正月初降

旨之期不過月餘誠如

聖諭恐難如期起辦無如目下冬寒地凍礙難先行興工臣與司

道再四酌商擬儘年內將承修道段工程各州縣分別派定並將應辦事宜應需經費次第竭力妥籌一俟明年正初解凍卽督催興作以期不至貽誤但冀仰託

福庇來春晴暖冰融不久互凍則諸事稍可順手將來修墊橋梁道路必有因時度地變通移易之處若與舊道處奏准里數不符應請

敕下該管大臣酌量體恤勿加駁斥臣等實沐

聖慈無既至

諭旨垂詢被災處所民力難支臣擬擇派高地有收之州縣查照舊章設法籌辦其被災較重處所應予剔除以廣

皇仁所有體察情形豫籌辦理

陵差各緣由謹繕摺據實覆陳伏乞

皇上聖訓示



順屬兵差由司局彙核摺

同治十二年十一月十九日

奏為順屬兵差巡報各案查對參差仍應照章由省城司局覆核彙報以歸畫一恭摺仰祈

聖鑒事竊據軍需報銷總局司道詳稱直隸通省向辦兵差報銷等案凡各路征撤官兵暨采買駝馬運送軍火軍裝餉械等項應需廩糧車馬司局接奉行知後即飭經由州縣照例應付各州縣供送該官兵過境即將銜名兵數斤重先行申報事後造冊由司局查報按例確核分別准刪逐起聯站彙造總冊報部請銷奉准後由司庫給領歸墊所以杜浮冒防歧錯而重庫款也同治三年六月以前業經開單奏報准銷其自三年七月起至八年十二月底止各屬供應兵馬運送軍火等差已於九年二月奏明設局開辦惟近年四路廳屬之大興宛平通州昌平順義三河密雲薊州

固安良鄉等州縣多有逕自造冊呈由順天府尹咨部核銷者所  
報或一二任及三四月不等司局前奉准銷部文因查現造司局  
總冊均經照章彙人應按任按起剔除免致重複卽飭照錄報部  
清冊送局以憑核對迄今僅據前大興縣知縣湛命年宛平縣知  
縣楊蔚本通州知州張鵬雲順義縣知縣石衡三河縣知縣周紹  
遠等錄送到局其餘各任均係事故人員屢催未據錄送以致無  
從釐剔而核對送到各冊上下站供應官兵數目復多參差兼有  
不應歸入軍需造報者或此有彼無一經比對歧錯互見卽如順  
義三河二縣本係聯站其供應調赴古北口駐紮之吉林黑龍江  
官兵上站三河冊造三千二百九十四員名下站順義則造報三  
千四百九十九員名又運送柴工銀兩及飯照費等項軍價向不  
歸軍需案內造報而大宛通州銷冊併行開列至各屬接遞軍報

添設腰撥其請添馬匹多寡必先報明司局酌量文報繁簡分別  
准減乃良鄉縣知縣陳鏡清一任竟造報添設至六十匹之多與  
司局核准原案不符部中惟據該州縣冊報核銷其與連站州縣  
及原報司案兩歧無從周悉如此辦理不特司局總案屢有紛更  
且絲毫皆闕庫款若任其逕報無上下站數目可稽易啟浮冒之  
漸況順屬州縣兵差准銷各款均係由司給領豈有報銷不由司  
局彙轉致違向章應請將大宛等州縣奉部准銷銀兩暫行扣發  
概由司局彙入總案分起覆核造冊報部應領銀兩若干以司局  
核轉報部准銷之數為準嗣後四路廳屬再有自行逕報者卽由  
順天府尹飭令送歸司局覆核彙報庶免歧錯而庫款亦多所節  
省等情詳奏前來臣查所詳爲章程畫一起見自應照辦除飭將  
兵差報銷各案由司局趕緊彙核詳請報部並咨順天府尹通飭

遵辦外理合恭摺具陳伏乞

皇上聖鑒敕部查照立案施行謹

奏

奏留吳贊誠片

同治十二年十一月十九日

再天津機器局仿製西洋鎗礮軍火事體繁重督理需才前經臣  
訪聞廣東儘先補用道吳贊誠清正有爲不憚煩苦又精於算學  
奏調該道航海來津隨辦洋務製造事宜該道於上年八月間到  
津赴局接辦一載有餘察看該道吳贊誠精細沈毅體用兼全駕  
馭中外員匠操縱咸宜綜覈工料鉅款絲毫不苟監製軍火日起  
有功近來天津海防暨直隸各處防營練軍所需既能源源濟用  
卽神機營時有調撥熱河察哈爾奉天營口等軍需及西北邊外  
各城征軍商辦要件亦多酌量應付洵足以備緩急而固根本臣  
駐津籌辦洋務棘手之件往往資其商推動合機宜該道實爲直  
省不可多得之員本年秋間接准大學士兩廣督臣瑞麟咨鈔奏  
稿內稱吳贊誠前署惠潮嘉道一年九箇月零會同總兵方耀辦

理湖屬緝匪微糧事務實心實力和衷共濟欽奉

諭旨賞給二品頂戴在案臣每諮詢與中官紳過津者僉稱吳贊誠政績循聲問閭思慕不置是其在粵已久著成效調直亦備歷勤勞伏思

畿輔要區中外輻輳吏治洋務均以得人爲要吏部新定章程內載各省辦理中外交涉事件奏調他省候補人員奉

旨准調差委各該督撫奏請改留該省補用應令補交離省分發銀兩等因相應請

旨准將二品頂戴廣東儘先補用道吳贊誠改留直省仍歸原班儘先補用俾收臂指之助如蒙

俞允再飭該道照章指繳分發銀兩是否有當理合附片具陳伏乞

奏聖鑒訓示謹

鄭魁士請議卹予諡

同治十二年十一月十九日

奏為專闕大員轉戰數省功績最著在籍傷發病故恭摺具陳仰祈

聖鑒事竊據宣化縣知縣方汝翊稟稱前署直隸提督原任浙江提督沙拉瑪該巴圖魯鄭魁士先因告病回籍家居數年舊傷時發時愈詎本年入冬後全傷畢發氣血虧損醫藥罔效於同治十二年十月十四日病故開具履歷事實請

奏前來臣查已故提督鄭魁士直隸宣化縣人現年七十三歲自道光年間由行伍積功補授湖南鎮守備奉調帶兵勦辦廣西髮逆出力升授廣西正安營都司遞補湖南九谿營遊擊免補副將以總兵記名簡放先隨向榮追賊至江南咸豐三年廬州失守奉



督兵赴皖北援剿其時提臣和春撫臣福濟倚之如左右手咸  
豐五六年克復廬州三河等處和春旋調赴江南督師鄭魁士奉  
旨會辦皖北軍務克復巢縣廬江等處疊蒙

文宗顯皇帝恩眷加隆補授安徽壽春鎮總兵

賞給頭品頂戴沙拉瑪該巴圖魯勇號

賞穿黃馬褂六年懷遠縣剿捻之役受傷數十處頭顱骨損蒙

恩賞拔毒散醫治又巢縣之捷

欽賜白玉搬指翎管等件八年調赴金陵會剿擢授浙江提督九

年奉

旨督辦安徽甯國軍務十年奉

旨調赴江蘇督辦東壩各處軍務該提督親提一旅屢捍危疆值

餉源絕續之交當羣賊縱橫之地卒能艱難維持疊奏奇勳每臨

大敵陷陣衝鋒出生入死身受重傷先後凡八九次偏體創痕鮮  
積見者無不寒心然大江南北一時著名勇將亦無不推鄭魁士  
爲最嗣因傷發增劇於十一年奏准開缺回籍同治五年捻逆北  
竄奉

旨飭赴直東一帶督隊協剿六年復奉

旨署理直隸提督八年秋又因傷病稟發奏請回籍跡其出處之  
際

朝廷倚任舊臣與該員之感激馳驅思得當以報

國者實相須於無既乃以積勞年久傷病大發遂至不起追維往  
績悼惜同深雖在籍病故核與議卹新章未符惟該員宣力行閱  
四十餘年由偏裨浮膺專閫疊蒙

先皇帝畀以督師重任該提督治軍皖省賊氛正熾地方整齊鄉

團與同患難親見該提督堅苦剛毅獨當一面驍勇絕倫洵無負  
國家干城之選至其馭眾恤兵嚴整寬厚江皖士庶至今猶樂道  
之迨後山籍起辦捻匪並署直隸提督協清

畿輔亦能力疾從公不辭泥瘁溯自軍興以來該提督由粵西用  
兵轉戰湘鄂蘇皖直東等省無役不從固與軍務相為終始其長  
子鄭永祥曾任浙江遊擊隨營勦賊亦於咸豐九年因傷歿於廬  
州營次一門戮力兩世效忠殊堪矜憫茲該提督在籍病故實緣  
受傷深重年邁氣衰所致且係屢任督師專闢大員勦勦卓越似  
非尋常立功後積勞病故人員可比合無仰懇

皇上俯念前勞將前署直隸提督原任浙江提督鄭魁士  
敕部議卹以爲戎行出力者勸至應否

予諡之處出自

特恩非臣所敢擅請除將履歷事實合部查照外所有在籍提督戰功最著傷發病故緣由理合恭摺具

奏伏乞

皇上聖鑒訓示謹

奏

議停長蘆欠款摺

同治十二年十二月初九日

奏爲核議停徵長蘆補欠積欠期限並傳辦各項仍歸南省辦解恭摺覆陳仰祈

聖鑒事竊臣前請將改派長蘆絲布絹箋等項仍歸南省采辦並停徵補欠積欠一摺奉

硃批著照所請該衙門知道欽此嗣准戶部以補欠積欠銀兩自同治十二年起予限五年暫予停徵扣至十六年限滿後照舊接額放徵並將核定期限卽行專案奏明其停徵期內儘遇內務府三庫衙門等處或有別項就近傳辦事件在於道光二十八年以後積欠各款項下籌辦等因查各商應交補欠積欠銀兩向於春秋兩關領引時按引完交本年接准停徵部覆已在九月下旬秋關將竣之時各商應交同治十二年前項補欠積欠業飭隨引勉

力措交所交銀兩已因奉文采買布絹照案動用應自同治十三年起將補欠積欠兩款停徵五年卅至十七年限滿後再行察酌情形照舊啟徵至道光二十八年以後積欠課款本因商力疲累無論如何催徵完納總屬無多厯次湊解京奉各餉實無餘銀再備傳辦各項應請仍照原奏欽奉

批旨一體復歸南省辦解以符向章而免貽誤據運司成孚具詳前來理合恭摺覆陳伏乞

皇上聖鑒謹  
奏

管河縣丞移駐片

同治十二年十二月初九日

再本年開挖任邱雄縣境內趙王河以瀉西淀積水業經奏報工竣聲明妥籌善後事宜在案查保定府境內之西淀係上游數百里河道民生一大關鍵淤阻已久水患頻仍今開趙王河以通去路並於該河兩旁築隄以防漫溢上下口設閘以資啟閉所有全河及隄閘各工皆甚緊要必須專有河員經理督率紳民認真修守方可經久若添設一官卽多一官之費因飭該管清河道會同藩臬兩司酌量情形擇員移駐茲據該司道與天津道會詳查有任邱縣東汛管河縣丞原管三岔口以上之大清河並淀河千里隄先駐任邱棗林莊嗣移該縣鄭州鎮距趙王河下游甚遠惟任邱之荷各莊爲趙王全河及該縣承傳管河道隄工適中之區擬令移駐該莊將趙王河隄閘一切修守啟閉事宜責成經管不准

稍有廢弛其舊管隄河足資兼顧仍飭各該縣合力照管該縣丞向無衙署屢經遷徙今責任既重應於苟各莊建造衙署另行籌捐辦理應需俸廉役食河兵口糧悉仍舊例該縣丞原有關防係任邱縣東汎管河縣丞字樣應換給任邱縣東汎兼管雄保等處趙王河縣丞關防一顆以昭信守等情具詳前來臣覆核無異除批飭照辦並分咨外理合附片具陳伏乞

聖鑒敕部換給關防施行謹  
奏



籌撥河夫工食片

同治十二年十二月初九日

再本年奏明開挖任邱雄縣境內趙王河以瀉西淀積水其下口  
鷹嘴壩建閘一座應設閘夫十二名責成該管河員隨時督飭測  
量水勢以時啟閉仿照安州州判等汛水手章程每名歲給工食  
銀十二兩每年共應需實銀一百四十四兩遇閘加增又無極深  
澤祁州境內滋河沙河唐河會於祁州三岔口爲潞龍河逕安平  
博野蠡縣高陽而達西淀前因沖決爲患修築隄工開通下口亦  
經奏報有案惟潞龍河挾泥沙唐三水奔騰數百里溜急沙多一  
經入淀水流漫散淀中不免積淤卽口門以內新開直河亦虞壅  
墊必須於每年春季水小時派委委員會同安州州判及各該州  
縣認真撈挖其口門以外淀水漸深難施畚鍤應雇覓堡船叔夫  
夾泥撈沙務期一律通暢汛漲無阻庶下不淤則上不潰隄工乃

可經久每年工費從少計算需實銀五百兩查有清河道衙門歲收雄縣安州定興高陽蠡壽元氏定州霸州任邱等州縣河淤地租一款每年額徵銀二千四百二十九兩零近年水湧蠲緩只能徵銀數百兩此項租銀本係留存道庫作爲河工歲修並歲發安州州判等四汛額設水手工食之用今趙王河下口閘夫工食及潞龍河下口挑淤工需皆關緊要應照現定銀數卽於庫存地租項下按年動支分飭核實經理涓滴歸公免其另案造冊報銷至趙王河上口擬建閘座因水勢淺深未定尙難定議將來如須建閘亦應照設閘夫核給工食據藩臬兩司清河道會詳前來理合附片陳明伏乞

聖鑒敕部知照謹奏

奉天米豆暫改折色摺

同治十二年十二月十九日

奏爲天津甯河兩縣海船代運奉天牛莊等處米豆賠累不堪該省既不能自行雇船又延不采買起運擬請暫改折色以恤商艱藉除積弊恭摺仰祈

聖鑒事竊奉天牛莊並錦州府屬義州等州縣解京米豆向由直隸天津甯河兩縣海船代運上年九月間臣因船戶困苦日甚該省起運無時久候空回力難賠累請歸該省自行雇船運津旋據奉省奏陳雇船窒礙經戶部議覆照舊辦理轉行遵照在案該船戶等復以無法代運屢次稟訴天津道求爲拯救由該道丁壽昌擬將奉糧暫改折色具詳前來查天津甯河兩縣海船代運奉省米豆本非分內之事自津至奉每石僅給水腳銀一錢四分不敷甚多向係該兩縣出海商船公攤津貼從前奉省米豆按時兌裝往返

不過兩月該兩縣海船共有七百隻津貼之費尙可支持自海禁一開生意被洋船佔奪該兩縣海船年年虧本多已折賣目下所存不及二百隻船日少則攤費愈重商日貧則籌費愈艱其例領水腳須照部章減發六成更形短絀奉省承辦各官疲玩成習往往倉無米豆復不及時采買雖戶部倉場奏參嚴限尙無開兌之期卽如本年牛莊義州於船到之後猶不買兌展據直省押運委弁船戶催詢並稟經咨會轉催一味飾詞搪抵仍令各船久候空回來年又須往候船戶深知其弊視爲畏途地方官實難勒偏惟聽處分而已況北河封凍較早若運津適值凍河該船戶卽懸鉤圍看守近年江浙漕糧提早運通奉糧須俟南漕運竣方能起卸北上該船戶一當此艱動輒兩年竣事坐食耗費苦不堪言而一船之中書舵水手不下一二十家因此啼飢號寒尤爲傷心慘目

現在各船已不能按時修脩焉有餘力攤貼鉅費再供此差若不  
亟思變計則現存船隻必將紛紛拆賣運務終歸無著奉省既不  
能自行雇船又延不采買起運徒累鄰民廢時失業該道擬請暫  
改折色實出於萬不得已上年給事中陳鴻翔曾有此請部議未  
准原以京倉緊要未可輕議更張但直省船累太重奉省銅弊太  
深非此無以免累除弊京倉本恃南漕東糧其奉糧數甚有限查  
牛莊等處歲僅額運粟米二千五百餘石黑豆四千六百餘石錦  
州府屬歲僅額運粟米一萬三千二百餘石黑豆一萬八千三百  
餘石其計米豆僅三萬數千石尙屬無礙大局若令奉省按照時  
價解交則一切無可藉口不致延不起運此項米豆有年例應放  
之款部中卽以所解折價及時搭放直省地方素產粟米黑豆且  
每年各路商船販運米豆雜糧來直銷售者約有百萬石此三萬

餘石米豆可由領價者各自購買亦於民食無妨其奉直兩省運費水腳一切雜支卽另存撥用省費尤復不少況奉省啟徵米豆多收折色歸運時始行采買今卽解交折色尙非遽改成章將來該省自能雇船仍可就地買運似無由折改本事繁難舉之慮既於

國計毫無所損而天津等處寥寥待盡之船戶藉以保全生業其感戴

皇仁豈淺鮮哉所有酌擬變通直省代運奉天米豆緣由理合恭摺具

奏伏乞

皇上聖鑒敕下戶部迅速議覆施行謹  
奏

李文忠公奏稿卷二十二

奏稿卷二十二

卒